



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

CM Sonowal-i Lakhimpur nung micro-containment zone yanglutsü tuyu

Putin anemer Navalny mashi mapang ka nung asütsü: Doctor

VOL. XVIII NO. 184 (ADOK 184) DIMAPUR TENTIONÜ (MONDAY) RONGCHII (APRIL) 19, 2021 ₹ 5.00

Taoba Nagaland chief secretary AM Gokhale süogo CM Rio-i anir VDB tenzüksang mang ayimer

Dimapur, April 18 (TYO): Taoba Nagaland chief secretary, Padma Shri AM Gokhale Deobarnü Covid19 agi shiranga süogo. Pa arishi küm 75 tain liasü.

Gokhale ya Nagaland cadre nungi 1968 batch IAS officer liasü aser pai January 2006 nung mapa nungi sodi mangu tashi Nagaland nung mapa balala inyakogo.

Taoba Nagaland chief secretary Gokhale-i Village Development Board aser Jawahar Rozgar Yojana indang mapa tajungtem inyakba atema 1990 nung pa nem Padma Shri agüja liasü.

"Nagaland nung taoba Chief Secretary, Padma Shri AM Gokhale tanep asüba osang angashia temolung raksar" ta Nagaland chief minister Neiphiu Rio-i metetdaksü.

"Pa asübaji par kinunger atema dang masü saka Nagaland nung alir ajak atema takoksa lir" ta Rio-isa ashi.

"Gokhale ya ketdangsür tajung ka, chichiba lennir ka aser shisashir ka liasü. Indian Administrative Service (IAS) ketdangsür ka ama küm 30 tema inyaka arudang pai temelenshi tajung aika bentsür aruogo" ta paisa metetdaksü.

(Maneni tapak 2 nung...)

COVID-19 Nagaland: Nisung 19 dak putet; 176 anepaludar

Kohima, April 18 (TYO): Deobarnü Nagaland nung nisung 19 dak COVID-19 aliba putet aser parnok züngsema nisung ajak agi 12,555 kümogo aser tang nisung 176 anepaludar.

"Tanü nisung 19 dak COVID-19 putetogo. Parnokji Dimapur nung nisung 14, Kohima nung 4 aser Longleng nung 1 lir. Külén, Kohima nung nisung 8 taneptsü nguogo" ta Health & Family Welfare Minister, S Pangnyu Phom-i metetdaksü.

Nisung 12,555 rongnungi 12,110 taneptsü nguogo aser tang 176 anepaludar, ta paisa ashi.

"Tanü-asüng nisung aika dak COVID-19 putetba ya asenok atema tekümdangtsü osang ka lir. Sorkar aser department-i yaküm inyakba ama iba wara anema inyakdar" ta Minister Pangnyu-i metetdaksü.

"COVID-19 wara ano metembang lir. Sorkar kijai dangbo iba tongpang nung takok mengutettsü anungji senso ajak teyari nungdaker. Vaccine agitsüpur ajaki vaccine agitsüla aser COVID19 SOPs sülen anidaksü mepishir" ta paisa ashi.

NTA-i JEE Main April 2021 tatidang athir

New Delhi, April 18 (Agencies): Linük nung COVID-19 kanga prokshiba ajanga National Testing Agency (NTA)-i Deobarnü JEE Main (April) 2021 anogo melenshitsu telemetba agiogo.

JEE Main (April) 2021 indang admit card kobi melii sayatsüba liasü saka iba maparen anenogo.

"Tang COVID-19 wara indang tensa dak rangloker aser ano tatidang agütsürtem aser ketdangsürtem kümzüka ayutsü atema JEE (Main) - 2021 April Session thinentüsü lemtego" ta NTA-i sangdong ka nung metetdaksü.

Tatidang agitsü anogo 15 jelia JEE (Main) - 2021 April session agitsüba osang metetdaksütsü, ta parnokisa ashi.

JEE Main (April) 2021 exams ya April 27-30 nung agitsüba liasü. Taküm February aser March nungbo tatidang takok ngua agiogo.

2020 nung coronavirus wara ajanga shisaluyimba nung tetsükdaksü tulu bentsür arua liasü. Yaküm entrance exams ajak menur ang agi aser September nung ang JEE (Main), JEE (Advanced), aser NEET agia liasü.

Yaküm tatidang menur agiba ajanga academic session 2021-22 menur ang tenzüksüsa aküm.

JEE (Advanced) exam ya kümshia May ita nungsa agir saka taküm July 3 nung aser NEET-UG August 1 nung agitsü lemtego.

JEE Main (April) 2021 admit card agitsüba den külemi NTA-i self-declaration form ka agitsütsü aser iba nung JEE Main aspirant shiai zülutsü.

Tatidang agitsüba kaketshirtem dak tesüiba anogo 14 tsungda shirangba yimya aliba/ maliba metettsü atema undertaking/self-declaration form ya amshitsü.

COVID-19 agi shirangertem anepaluba Remdesivir mozü jenjang ajemogo

New Delhi, April 18 (Agencies): COVID-19 agi shirangertem anepaluba mozü Remdesivir yanglurtemi jenjang ajemogo.

Centre-i Remdesivir yanglurtem den senden amenba sülen iba mozü jenjang ajemtsü telemetba agiogo. Iba senden nung mozü timba yanglutsü, belenshitsu aser jenjang ajemtsü indang jemba liasü.

Ajisüaka, mozü jenjang ajemba ajanga mozü agi anünga kümogo. Remdesivir mozü yangluba company-i jenjang 39% shi ajemba ajanga iba mozü bushir talila kümadokba agi peria mangur.

Zydus Cadila company-i 100mg vial ka nung Rs 2,800 agi

ayokba nungi Rs 899 tashi aluogo.

"Iba ama tongtipang mapang ka nung sorkari tiyongtsü nung ia inyakba ajanga nübertem anisüngzüksüogo. Remdesivir indang jenjang aluogo aser iba atema Pharma company temi PM Narendra Modi-i Covid-19 anema raraba nung külemi noktakba atema pelar" ta Union minister for chemicals and fertilizers Sadananda Gowda-i metetdaksü.

Sorkari tiyongtsü aiba ajanga 'Remdesivir injection' yangluba company 7-i maximum retail price (MRP) aluogo, ta National Pharmaceutical Pricing Authority-isa ashi.

Cadila Healthcare-i REMDAC

(Remdesivir 100 mg) injection Rs 2,800 nungi Rs 899 aluogo. Syngene International-ia RemWin indang jenjang Rs 3,950 nungi Rs 2,450 aluogo, ta NPPA-i metetdaksü.

Maneni, Dr Reddy's Laboratories-ia REDYX indang jenjang Rs 5,400 aliba nungi Rs 2,700 aser Cipla-i CIPREMI brand Rs 4,000 nungi Rs 3000 aluogo.

Mylan-ia Rs 4,800 nungi Rs 3,400, Jubilant Generics-i Rs 4,700 nungi Rs 3,400 aser Hetero Healthcare-i COVIFOR mozü nung Rs 5,400 aliba nungi Rs 3,490 ajemogo, ta National Pharmaceutical Pricing Authority-isa metetdaksü.

Myanmar nung tepuokdak ayur 23,000 tema chiokogo

Yangon, April 18 (Agencies): Myanmar nung mitkartemi lungkak aiterem apuba aser arrest warrants agütsüba manener saka Honibarnü parnoki linük ajungalen tepuokdak yua alir nisung 23,000 den timba chiokogo.

Myanmar nung Buddhist New Year benjung amongdang tepuokdak ayur meyirjang aika chiokba ya yimya ka lir.

Senior Gen. Min Aung Hlaing-i tepuokdak yua alir nisung 23,047 nem tatok agütsüogo. Parnok rongnung bendanger 137 dena lir aser parnok Myanmar nungi yoktsü, ta ketdangsürtemi

metetdaksü.

Myanmar nung April 13 nungi tenzüker Buddhist New Year benjung amonger. Ajisüaka, takümba mitkar anema lungkak aitertemi sodi mapang taliba lungkak aityonga arur.

Myanmar nung taküm Armed Forces Day mamongdang tepuokdak yua aliba lungkak aiter nisung 900 shi chioka liasü.

February 1, 2021 nü Myanmar nung mitkartemi sorkar atsüngdokba sülen nungi nisung 3,100 tashi

"Sepaitemi sorkar atsüngdokba sülen lungkak aiter 728 shi tepsetogo aser civilian

lennir Aung San Suu Kyi densema nisung 3,141 tashi pua lir," ta Assistance Association for Political Prisoners-i metetdaksüogo.

Honibarnü Yangon nung aliba Insein Prison nungi chiokertem rongnung 2019 küm apuba political prisoners asem dena lir.

Parnok ya Peacock Generation performing troupe nung züngsema lir aser küm tasen benjungmong nung parnok yagi Parliament nung mitkar teshimtem nübotem adenba aser shishilembabaren nung mitkartemi shilem agiba lutsüba jilushitem ayir.

MCCI-i business inyakertem atema Covid-19 tetendangba agitsü


Mokokchung, April 18 (TYO): Mokokchung Chamber of Commerce & Industry-i achayanga Mokokchung district kübok shishilembartem atema Covid-19 tashitak tendangba (random testing) maparen ka inyaksü aser iba tetendangbaji

temulungertem atema aser angati dang agitsü, ta MCCI tir - Tsükti Longkumeri sangdong ka ajanga metetdaksüogo.

Anungji, Mokokchung district kübok shishilembaba maparen balala inyakertem (traders and business community) shirnoki iba

tetendangba aginür, nenok tenung aser kuli tejangja MCCI nem yaktatiba nung agüjang. Iba dak sentakba nung osang tejangja agiteptsü atema iba number - 943600602/8415043591 nung tongtepreteptsü akok, ta MCCI tirisa metetdaksü.

Ao lanurtemi Dimapur lenmang yanglushitsü



Dimapur Ao Lanur Telongjem kübok Duncan mepu nung aliba lanurtemi Midlane kiyong nung lenmang yanglushitsüba angur. (April 17, 2021).

Dimapur, April 18 (TYO) : Dimapur yimti nung nübertem jajaba lenmang tongtibang ka, Forest aser PWD department-tem amenoka aliba office-tem anasa Midlane nung lenmang onsara mejungi raksar aliba ngua, Dimapur Ao Lanur Telongjem kübok Duncan mepu nung aliba Ao lanurtemi parnok nübo aser rongsen tenla agüja yanglutsüogo.

Lenmang ya kanga mazüngi jajaba lenmang lendi ka asünungji,

parnoki anüngdang masü saka yasüng Honibar aonung 8:00 ako nungiang tenzüka ali menüngtemba gari dena bener arua inyaka liasü.

Iba lenmang yanglushitsü atema Ao lanurtemi District Administration dang nungi temelaba meshir inyak ta parnok lenirtemi metetdaksü. Iba lenmang yanglushitsüba sülen parnokisa lenmang anepalur department nung ketdangsertem ajurua

lenmang anepalua junga ayutsü indang jembitsü ta parnokisa ashi.

Dimapur Ao Lanur Telongjem Duncan Unit purtemi yanglushitsüba lenmang anasa Ao Kaketshir Telongjem Dimapur purtemi parnok hon jubilee amongba nungtem nung nübertem asoshi yanglutsüba sidewalk metre noklang asem shi ka lir aser iba long jara piyong nung Aor lanurtemi noksa tapu balala yangluja lir.

Viswema, Kidima aser Khuzama lemjem nung park ka lapok



Latakrü Park nung Rev Atha Neikha, pa kinungtsü aser Latakrü Whemi nungi züngsemtem tangokba noksa ka yangi angur.

Kohima, Rongchii/April 18 (TYO): Kohima district kübok Viswema yimtsüng nungi Latakrü Whemi züngai Krayo nung Latakrü Park ka yanglua liasü.

Viswema, Kidima aser Khuzama sendaktepba lemjem nung iba park ya April 17, 2021 nü Angami Baptist Church Council (ABCC) Mission Director, Rev Atha Neikha ajanga sayatsü.

Iba park yanglutsü asoshi ali ya asür Puzon Kin indang kinungtsü Medongonü Kin aser par chirnurtemi agütsü aser park ya Latakrü Whemi ajanga yanglu.

Rev Neikha-i iba park lapokba sentong nung jembiba mapang, Latakrü Whemi ajanga iba ama sentong tajung

atongteta inyakba asoshi tenüngsang agütsü, koba agi lenmang nung senzürtem aser aluyimer nem anisüngzük agütsütsü, ta ashi.

Pei tejangraba yutsür lokti asoshi mezüng süa inyakba ajanga Latakrü teloki tatishitsü tajung sayutetogo, ta pai ashi.

Iba mapa tajung yagi Latakrü kisüng masü saka R. Khel aser Viswema yimtsüng ajunga mera kettsür, ta pai ashi.

"Asen putu ya asen tebilemstü lir, anungji aseni aginüba yimya nung lanurtem anitetsüla. Tsürabur ka ama asenoki tanurtem dang yimya tajungtem, mürekmejuba, tain dang akumtsüpüba yimyatem sayutetsüla," ta Rev Neikha-i ashi.

Senzüsemponger aser aluyimer temi iba park ya tim yimya nung amshitsü aser müreka ayutsü imlar, ta paisa ashi.

Latakrü Whemi nungi züngsem, Vitsorel Lcho-i ashiba agi, iba telok ya 1984 küm tentet aser iba mapang tetsür 12 aser tebur 12 liasü aser parnok ya kibong ka amai liasü.

Nüburtem tenzüksü nükla nung park ya yanglu, ta pai ashi.

Iba sentong nung Latakrü secretary, Vichosel Rhütso menden liasü, kong Advisor, Youth Resources and Sports, Zale Neikha dena liasü.

Sentong nung Seshe & Sanei aser Latakrü Whemi züngsemtemi temeja ken aten aser Vithel Pusa-i tepela ankep o jembia liasü.

Kohima nung mi lendong nungi kumzuka alitsü yimyatem sayu



Fire Week 2021 nung shilem ka ama Naga Solidarity Park, Kohima nung mi lendong nungi kumzuka alitsü asoshi yimyatem sayuba aser lecturer agütsüba sentong ka agidang Nagaland Fire & Emergency Services ketdangsurtem aser sentong nung shilem agirtem tangokba noksa ka yangi angur.

Kohima, Rongchii/April 18 (TYO): Fire Week 2021 nung shilem ka ama Nagaland Fire & Emergency Services ajanga Naga Solidarity Park, Kohima nung mi lendong nungi kumzuka alitsü yimyatem sayuba den lecture agütsüba sentong ka April 17, 2021 nü agia liasü.

Iba sentong nung ASI Menose Zashumo ajanga 'Fire Extinguisher' amshiyim, ASI Dzesengutuo Keyho ajanga "Gas Fire", SI Inaka ajanga "Search and Rescue Technique", Thepfii kranyu ajanga "Do's and Don'ts" aser SI Chumbemo Patton ajanga mi remsepba yimyatem sayuba liasü.

Iba sentong tenzüka

Inspector Sedevizo Hibo (OC South) ajanga jembiba, kong SI Neiketuo Soppfi (OC North) menden liasü.

Iba sentong nung shisalen sayurtemi nüburtem dang Fire Extinguisher amshiba yimya aser mi lendong nungi kumzuka alitsü yimya balala tem sayuba liasü.

Mi ya tabu balala lemsa lir, aser itemji süng, süoshi, kakat, rubber aser plastic amala nungi adokba mi; petrol, kerosene, diesel, paints amala mi jangrutsü akokba oset, tzü mesüra tango nungi adokba mi; LPG, Methane, Ethane, Propane, Butane ama tango nungi adokba mi aser magnesium, titanium, zirconium, sodium, potassium

ama yin nungia mi ya adoker, ta ashi.

Mi lendong nungi jenbuttsü aser kumzuka alitsü mechi department ajanga nüburtem dang kidang tongtipang tesem nung mokozü putetba (smoke detector) hadir aser alarm inoktsü, mokozü putetba hadir lapoka mamshitsü, iba hadir mapa shidak inyakba temdangsunangba ajak indoktsü ayongzuka liasü.

Sentong nung department ajanga pamphlet lema agütsüba nung nüburtem dang kitsük-kirong lendong mapang tsüba maoksateptsü saka timi mera agia pei tesem nung aliba fire station nem osang agütsütsü shia liasü.

NRDSA ajanga asükhu lemsateper

Dimapur, Rongchii/April 18 (TYO): Taoba mapang Nagaland indang Chief Secretary inyaka alisang A. M. Gokhale, Pune nung asüba osang angashia Nagaland Rural Development Service Association (NRDSA) kanga sasa bilemer, ta Kupto Achumi, General Secretary, NRDSA ajanga sangdong ka nung ashi.

Pa ya Nagaland nung VDB

tenzüksang, ta teti bilemtetsü. Pa ajungben asüba ajanga onok ajak aoksar aser mangyimer kibong den asükhu lemsateper. Tulusang Tsüngremi mangyim tia nung alir nem tashi tasen agüjang aser pa tanüla teti tatem maka tesunep nung anisüngzükjang ta sarasademtsür, ta sangdong ajangasa ashi.

NDPP ajanga Tamsuwati Lkr nem tenüngsang agütsür

Dimapur, Rongchii/April 18 (TYO): Planning & Co-ordination Nagaland nung Adl. Development Commissioner menden nungi anisüngzük alisang (Retired) Tamsuwati Lkr (Longsa), Naga yimten aser nüjiso metetba tanishir tajung ka ta ajiteta Nagaland Indigenous People Forum (NIPF) committee ajanga April 17, 2021 nü küm asem asoshi tir inyakttsü

shimba atema kanga dang pelar aser tenüngsang agütsür, ta S. Imtiwabang Jamir, Secretary State & CEB, Nationalist Democratic People Party, Nagaland ajanga sangdong ka nung ashi.

Naga nung tashitemeter aser shisa akar ajaki pa den nungita yariteptsü mepishia ayongzük, ta kasa sangdong nungsa shia liasü.



Keep Our City Clean (KOCC) team aser Kohima Chakhesang Churches Women Fellowship lungjemer Kohima nung aliba Classic Island nungi PHQ lemjem tashi April 17, 2021 nü mürekmejuba sentong ka agia liasü. Taruba Honibarnü Chakhesang Baptist Church, Minister's Hill den lungjemer PHQ lemjem nungi Mohonkhola tashi inyakttsü.

Taoba Nagaland chief ...

(TAPAK 1 NUNGI...)

"Nagaland nung pai Village Development Board tentetsü shisatet aser iba ajanga yimtsüng jenjang nung terenlok mapa inyakttsü tenzü. Linük nung Panchayati Raj rejutem melapokdang pai VDB tenzüka liasü" ta Chief Minister Rio-isa ashi.

Nagaland nung alirtem tashi aser sobaliba nung ajemdaker pai People's Act ajanga Nagaland Environment Protection and Economic Development (NEPED) tentetsü. Iba takok ajanga state sorkari Bamboo Mission, Honey Mission amala mission balala tenzüko, ta paisa metetdaksü.

Gokhale-i Nagaland nung alirtem aginüba atema inyakttsü aser pa teti onok molungjang nung alitsü, ta Rio-isa shisem.

"Iba mangyimba mapang ni Savita Gokhale aser tanurtem den asükhu lemsatepba metetdaksür aser Tulusang Tsüngremi iba takoksa koktetsü atema nenok nem tashi agütsütsü sarasademtsür" ta Nagaland Chief Minister-isa metetdaksüo.

Y PATTON ASER K THERIE NATI ASÜKHU LEMSATEPER:

Deputy Chief Minister aser BLP leader Y. Patton-i aser NPCC President K. Therie natia sangdong balala ajanga taoba Nagaland Chief Secretary Padmashri AM Gokhale IAS (Retd) asüba

atema mangyimba metetdaksüo.

Nagaland nung Alder tong atemba maparen tenzüksangji Gokhale liasü. Iba ajanga tekong lu ayimba nung teyari angu aser arem kümzuka ayu, ta Y. Patton-i ashi.

"Phek district kübok Ketsapo nung Village Development Board tenteta pai rural development atema alizüng ayuba asangsang aküm. Nagaland nung alirtem Gokhale teti bilemteter aser pa asüba ya linük atema takoksa tulu lir. Nagaland state BJP MLA tem tenüng nung asür kibong den asükhu lemsateper" ta Media Cell, Dy. CMO sangdong ka nung ashi.

"A.M. Gokhale (IAS) ya lokti atema bilemstür ka aser nübor bendanga agüja tenzüker ka liasü. Pai jenjang teküpoktiba tashi nung sorkar ketdangsuba bener arutsü merangba ajanga VDB inyakyim tenzüker aser NEPED tentet" ta NPCC President K. Therie-ia sangdong ka nung ashi.

"Pai Naga nung meimba teti bilemtetsü aser pai inyakba mapatem Naga loktiliba indang putiotsü nung teti züluoka ayutsü. NPCC züngsem ajaki mangyimba metetdaksür aser Tsüngrem taochi agi asür kinungertem molung sünepjang ta sarasademtsür" ta K. Therie-isa ashi.

Meghalaya Governor-i GHADC indang mezüing session jateper BJP aser Congress opposition nung amentsü



Shillong nung aliba BJP office nung Garo Hills Autonomous District Council (GHADC) nung takok angur BJP MLA 2 den state ketdangsürtem agiba noksa ka angur.

Tura, April 18 (Agencies): Meghalaya Governor Satya Pal Malik-i Garo Hills Autonomous District Council (GHADC) kümtetsü atema mezüingbuba session ayongogo.

Iba session nung MDC tasentemi tezüingzüktep agitsü.

Meghalaya Governor-i April 19 anepdang 11:00 ako nung tezüingzüktep agitsü atema session ayongzüker ta District Council Affairs department-i metetdaksü.

Meghalaya Governor-isa April 21 nü GHADC indang chairman shimtsü atema anogo latetogo.

West Garo Hills district deputy commissioner, Ram Singh-i session anaprong ketdangsütsü.

GHADC nung MDC 29 shimtetogo aser ano Governor-

i züingsem ka shimtsü. Külen, NPP-i ketdangsüba GHADC nung BJP aser Congress teloktem opposition nung amentsü.

GHADC nung BJP züingsem 2 lir saka parnoki National People's Party (NPP) den melokteper.

Meghalaya High Court indang tetuyuba ka ajanga executive committee ji züingsem 15 agi masü saka züingsem 17 agi akümtsüla ta shia lir, anungji parnoki iba nung ajemdaker Governor tsüingdang ken o benoktsü ta BJP-i metetdaksüogo.

"Onoki executive committee tasenba nung shilem agitsü mariteper" ta state BJP office nung Bernard Marak-i osangbener dang ashi.

GHADC nung executive

committee (EC) tasenba nung pa chief executive member (CEM) inyaktsüla ta Marak-isa ashi.

GHADC nung ochimashi merüktetsü atema nübortemi pa CEM inyakdaksünür, ta paisa shisem.

April 12 nü GHADC election agi aser April 15 nü votes azüing. Iba election nung Congress-i menden 12, NPP-i 11, BJP-i 2, Garo National Council (GNC)-i 1 aser Independent 3-i takok ngua liasü.

Ajisüaka, NPP-i züingsem 15 denür Executive Committee (EC) tasen akümtsü atema Governor dang asüingdang.

GHADC nung Congress nungi züingsem 12 aser BJP züingsem 2 opposition nung amentsü.

CM Sonowal-i Lakhimpur nung micro-containment zone yanglutsü tuyu

Guwahati, April 18 (Agencies): Lakhimpur district kübok Covid-19 putetba tesem nung iba tashidak prokba azüoktsü atema Assam chief minister Sarbananda Sonowal-i Lakhimpur district administration dang micro-containment zones yanglutsü tetuyuba agütsüogo.

Covid-19 putetertem anepalutsü asoshi mozüki indang intensive care units (ICU) nung yipden aser oxygen cylinder tem peria ayutsü asoshi paisa district administration nem tetuyuba agütsü.

Honibarnü Lakhimpur semdangba mapang, chief minister-i iba district nung Covid-19 testing facility timba kümtsütsü atema ketdangsürtem dang shiogo.

Honibarnü Lakhimpur nung nisung 36 dak Covid-19 putet aser tashidak tasen puteter densema iba district nung Covid-19 puteter nisung 7996 tashi kümogo.

Taoba hopta Lakhimpur district kübok Dhalpur nung alir ka Assam Medical College Hospital, Dibrugarh nung Covid-19 agi shiranga asü.

Kasa mapang, nisung o nisung tsüingda menashia aoba wara azüoktsü asoshi asadangshia mittsü atema district administration-i meratem agiogo.

Tang North Lakhimpur Civil Hospital nung ICU yipden trok aser oxygen cylinder 81 lir.

Ano külen, iba district kübok tesem balala nung Bihu sentong balala ayonga agiba dak sendakba nung tebilemtsü adokbatem Chief Minister-i lemsatepa liasü aser Covid-19 protocol nung anidak asoshi pai nübur dang mepishiogo.

Kamrup (M) administration-i Bihu sentong ajak athir

Guwahati, April 18 (Agencies): Kamrup (Metro) district administration-i Hombar nungi Rongali Bihu stage sentong magidaksütsü telemtetba agiogo.

Kamrup (Metro) district nung nisung aika dak COVID-19 putetba agi parnoki sentong agitsü temelaba agüja aliba ajak meyipa agiogo.

Honibarnü stage Bihu organising committee tem den senden amendang iba telemtetba agi ta osang angazüker.

Kamrup (Metro) district nung nisung 300 tema dak COVID-19 putetra stage programme ajak athitsü ta telemtetba agia liasü.

Yaküm COVID-19 wara aser lockdown ajanga Assam

nung Rongali Bihu memongtet. Bihu sentongtem nung shilem agirtem indang senotsü timtem angateta state sorkari taküm standard operating procedures (SOPs) kar lateter benjung amongtsü temelaba agüja liasü.

Ajisüaka, Kamrup (Metro) district aser talisa Guwahati nung nisung aika dak COVID-19 aliba putetba ajanga district administration-i Bihu sentongtem ajak athitsü telemtetba agi.

Assam nung Kamrup (Metro) nung nisung 360 dak COVID-19 putetogo. Iba district sülen Kamrup nung nisung 56, Sonitpur nung nisung 47 aser Dibrugarh nung nisung 42 dak puteta lir.

Tezpur University-i kaketshirtem dang hostel toktsür aotsü tuyu



Guwahati, April 18 (Agencies): Tezpur University campus telongtet nung Covid-19 tashidak puteter timba küma aoba atema April 23, 2021 tashi nung hostel toktsütsü atema kaketshirtem nem tetuyuba agütsüogo.

Ajisüaka, iba reju tekolakpurtemi, final year post-graduate aser undergraduate kaketshirtem aser Ph.D. research scholar tem hostel toktsür maotsü ta shiogo.

"Iba University indang final year aser Ph. D kaketshirtem dak alaka PG/UG kaketshir ajak 23.04.2021 matongdang campus toktsür aotsüla. Parnok aliba takdang nungi osettsüsettem bener aotsüla mesüra hostel kübok tesem kar nung parnoki pei pei osettsüsettem ayutsü akok" P Deka, Dean, Students' Welfare of Tezpur University-i metetdaksü.

Iba hostel toktsür maodang

kaketshirtem dang pei pei takdang indang sapi Caretaker/ Security personnel nem agütsütsü atema tuyuogo.

"Taoba mapang metetdaksüba ama COVID-19 inyakyim sülen anidaka Final year PG/UG kaketshirtem April 29, 2021 tashi iba campus telongtet nung alitsü akok. Iba anogo tashi nung PG/UG kaketshirtemi parnok indang research/laboratory maparen tema inyaktsüla aser April 30, 2021 tashi nungbo parnoki pei pei osettsüsettem bener hostel takdang azüingtettsütsüla" ta Deka-isa metetdaksü.

Ph.D. kaketshirtemi hostel toktsür aotsü atema reju tekolakpurtemi yakta osang metetdaksütsü, ta paisa shisem.

Ano külen, osang tejangja ka magütsü tashi bendanglen nungi aruba kaketshirtem pei pei hostel takdang nung dang alitsü melar, ta Deka-isa ashi.

ONGC engineer ka Covid-19 agi asü

Guwahati, April 18 (Agencies): Deobar Assam nung nisung 876 dak coronavirus putet aser parnok züingsema state COVID-19 puteter nisung 2,23,816 kümogo. Tang nisung 4,794 anepaludar.

Tang AMCH nung Covid-19 positive puteta alir nisung 30 anepalur. Parnok rongnung, nisung 17 Covid isolation ward aser nisung 13 Covid intensive care unit nung lir.

Hazarika dak Covid-19 putetba sülen AMCH nung pa anepalua aru. Pa dak diabetes den tanga timtem kar liasü. "Tesüiba anogo ishika tejakdang nungi Hazarika AMCH nung anepalua aru. Diabetes aser tanga timtem agi pa kangshia liasü. Onoki pa taküm kümzüksü asoshi tajungtiba agi anepaluogo, saka tanep 9:20 meta pa süadok" ta AMCH nung doctor kati ashi.

Tesüiba ghonda 24 tsüingda Assam nung nisung 876 dak coronavirus putet aser parnok züingsema state COVID-19 puteter nisung 2,23,816 kümogo. Tang nisung 4,794 anepaludar.

Tang AMCH nung Covid-19 positive puteta alir nisung 30 anepalur. Parnok rongnung, nisung 17 Covid isolation ward aser nisung 13 Covid intensive care unit nung lir.

Honibarnü, AMCH nung Tinsukia nungi Advocate Neyim Ahmed Covid-19 agi asü.

Iba district nung tesüiba ghonda 24 tsüingda nisung 34 dak Covid-19 putetogo.

Tesüiba hopta ana tejakdang Dibrugarh nunga nisung 347 dak puteta liasü.



Honibarnü Mizoram kübok Serchhip assembly constituency nung by-election agidang tangokba noksa angur. Yashinep 7:00 ako nungi tenzüker yasüing 7:00 ako tashi nung 29 polling station 29 nung vote enoktsür 83.8% liasü.



TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 19, 2021

Asen lima asoshi

Dimapur yimti tiyong nung traffic police nokdakba traffic point tashi nung lenmang majungba ajanga motzü atsünger aser aji ajangdang ayong ajanger amai tarok tapa paidoker mepaidokpu gari tilabo alilen tsükdaka yur mouteter. Iba jang dang masü saka kiyong balala leni aoba lenmang aika onsara majung kümer kibur maliba lenmang aser kibur maliba yimti amato kümdagi. Iba ama tensa tia ka nung, pei lima topur majungba aser pei nübertem lenmang tamajung nung timtemba ngua, Duncan mepu nung aliba Dimapur Ao Lanur Telongjemi pei nübo aser pei rongsen agi Midlane kiyong nung Yimkong Sidewalk aser Multi speciality mozü ki anasa lenmang kanga mejungi raksar aliba yanglutsüba jang pei lima asoshi peisasa mulungteter inyakba mapa tajung ka asütsü. Iba tesem ajangdang, lenmang onsara majung nungji nisung ajak tejak ashir ajanger aser gari dang masü saka temang dena raksar. Aji oda, iba tesem ajang shia aikati government nüngsen jembia ajanger aser PWD purtem aitsür, kechiyong yimkong lenmangjibosa government-i anepalutsüla. Ajisüaka, tamalen mapang ka mashimashi (substandard) ka yanglua yutsüba to serbo anepalur (maintenance) mali, lenmang repringba department-a anena adok amato akümer aser nübertemia nüngsen jembiba dak alaka government inyakyimji asungdangtepa moutetter aser tang lanurtemi inyakba amajia peisasa tenla agüjaa meinyaker. Ajisüaka, senso ka mapaji, government nem nübertem asoshi kanga nungdakba mapatembo rongshia inyakdaksütsüla aser nübertem asoshi kanga nungdakba mapatembo government-i meinyaksüra pei nübo aser pei rongsen agia inyaksüla. Kodang asenoki yimkong jajaba lenmang ka, government-i anepalu mesütetba repringteta asen nübo aser asen rongsen endoka yangludir, iba jagi asen temulung uludaksür aser government tsungdang asen temeten indang jembitsü tesadamba kümdaksür. Tanü asen lima merenlokteti tamajungba küma aoba kuli kaji, government-ia meinyaker aser nübertem mulungjang nunga pei meyong lima aser pei yimti ta bilema tenla agüja inyakba mali, ajak pei asoshi dang bilema inyakba agi, pei kibo topur tajung aser tuluka saka yimkong lenmang aser kiojenbo tamajungba aser tilaba akümer. Atangji taitsütsübo temela saka mapa shitak inyaksü tasak. Aji oda, senso kati pei lima asoshi mapa tuluka meinyaktetsüa akok saka senso shiai pei lima asoshi anogo shia mapa tilala kakabo inyaktettsü. Item mapa tilatem rongnung tesem ka nung süngdong tilaka tema yutsüba asütsüa akok, motzü junga moi aliba kilentsü ka yapoka yutsüba asütsüa akok, kima yimdong janaa aliba merüktetsüba asütsüa akok aser tang amaji lenmang tapok atepja inyaksüba jang asütsüa akok. Shin o nung ashi ama, amang aija kazü dang nungibo milen tilaka tsüklokba tajungba. Amang maginüba agi amang aitsüba jagi sangwa marutsü saka milen tilaka asüyonga aji tsüklokba agiang tesangwajibo arutsü. Dimapur nung tang Ao Lanurtemi lenmang yanglushitsüba tesemji parnoki meyanglushitsü tashi amang amai liasü. Iba tesem ajanga süir ajaki lenmang majungba anemaji nemnem aser aitsü saka shingaia lenmangji ajangtsü atema nia kechi inyaksü tabo bilema maru. Aji oda, amangsa aija alitsü agibo milen tilaka tsükloka yutsüdi ta bilemteta inyakertemji lanurtemji asütsü. Parnoki pei lima amang tia nung aliba repringteta milen tilaka tsükloka yutsüba ajanga tangbo ajak tesangwa nung jajadagi. Tanü lanurtemi mapa tajung jagi Dimapur lima ya bendang lima masü saka asen lima ta ano khen asenok nem nenshia angatetdaksür. Asenoki Dimapur yabo lendang semtu amai bilemer, iba jagi lenmang, kaketreju aser mozü ki majungyonga kecha shishia mali, pi meyong amai dang bilemer. Iba jagi asenok akoksar aser asen temeten indanga kibur küma tasü itita mejembitet. Kong lidir liaka, kibur küma alitsüba jang tashiyim agi masü saka tang amaji asen alidak asen tenla agi nübertem nungdak repringteta inyaksüba agi akümtsü. Senso ka temetenji pei alidak kecha meinyaki maongka aser temoatsü dang agia amongtsüba masü saka pei mapa aser pei tenla agiang temetenji jangjatsü.

OLEMSABANG

Putu den apet tenzüker

~ O. Meren Longkumer (Otongdar)

(Yashi adok nungi...)

Yamaji tesüiba putu nung theological education tetezüji arogo nung Pastor, Tesayula, Evangelist, youth Director, Child Director etc. item mapa inyaksü atema dang amai angateta aru (narrow concept).

Laishir mapaji tanüla anir arutsüba mapa, pulpit ministry ta dang angateta amshia aru, saka tanübo iba tangatetba nungi theological education-ji tesadembaleni melenshiogo aser aji; "tanüla aser loktiliba rangben nung nüchi kümdaksütsüba jang theological education nükjidongji lir". Iba tangatetba nung Tsüngrem tenzükerba wadang sadema yanglushia taküm rangben nung tekümtet agütsütsü asoshi tanü putu nung tenzükertemi merangtsüla. Alima keraa aienba den külemi tenzükerba khuret-a timba renloker, anungji iba putu den liromedema lenmang ajak nung ten zükba wadang tasen renloka aotsüla.

Naga lima Khristan state tabo jembir saka sentepi marur amangbapurtem 75% dak tema kümadokogo. Ao lima Khristar Arogo tenzüker küm 137 dak tema liyonga arudang arogo inyakyim nung terakata mesüra kangabo temelenshi mangur. Tejen yimya nung osangtajung sangdongba-sentep-i aoba, sayutsüngiba, kibok sema senzüba, sentepi arur asoshi Arogo nung sentong tajung balala yanglua küm shia agiba, iba yagi tangbo tanü putu nungbo meperir ta bilemer.

Arogo nung züngsem tajung aika sentep ki kodonga mungudangertem lir, item pur asoshi arogo teinyaksü mapa tulu lir masü no?

Tsüngrem O-i ashir "san tokur-tokuji toktsür temadokba kaji mangu tashi bushitsü asenok shilem lir (Luk 15:4b)".

Sentep-i teti arur asoshi dang sentong tajung yanglua agir, sürabangla kasa arogopur, kasa Khrista dak amanger sentep ki mungudanger rogojibo odang toktsütsü asü? Tanü putu nung ibai khen arokaroka shisadangtsü nungdaker. Anungji sentep kidang dang sayutsüngiba kisüng ya mesüi sentepi marur rogo asoshi kechi koda tenzükerba wadang nungji melenshia sentong renema agitsü aji Arogo khuret lir. Tanü tensa town aser jila ajak nung saisabong aika tenteta, yi jentepa aonung sangwa-a longso tepa kazü tepa mapang amajok nung indokba kijung lanur aika lir. School mezüngteti tom nung anenadokba lanurtem aika pei nükjidong metongteti taküm nung tezüdang alur, taküm raksaa indokba jenti angutsü, aser item lanurtem mozü lar kümer lir. Tsüngrem külemtsü majenaraba lanur aika dang adokdagi, aser parnoki tenla kodangi aotsü mebilemer mesüra kodanga mejangrar. Anungji Arogoi item nübertem asoshi tapet tenzükerba wadang inyaksü nungdaker. Parnok anitetsü? Item nübertem anidena tanüla kümsükdaksütsü asoshi Arogoi aser tenzükertemi shilem tulu agitsüla ta angateter.

4. Home Mission:-

Tenyaba mapa inyaksü asoshi tongtipangtiba telokji arogo ya lir. Tenyaba mapa ya putu tensa balala nung inyakyim balala ajanga inyaksü nungdaker. Anungji putu ajak nung mission inyakyimji teti kasa asütsüla saka, ibai putu tensa den apet melenshia aotsüla. Mission aser evangelism teinyaksü tasaktibaji home mission nung lir. Pei arogo nung amangbapurtem taküm tia jenjang ajak asadanga, tapet sayuyim den külemi Tsüngrem osangtajung sayutsüji rongdak nungdak ta angateter. Talisa, alima karaa ainba den ali rongsen talubosa züinba ajanga amangbapurtem aiben Tsüngrem külemtsü tekülem kidangi marutetba pur jenti lir. Item telok dangi Tsüngrem osangbener oa, parnok tanüla kümsükdaksütsü mission mapa ya kanga tongtipang lir. Adangji item dak alaka, sensakbu, matamabensartem aser taküm nung tamakok ngur sasasete alirtem telokjia asenoki mesendoktsü tim.

Mapang ka arogotem aser tenzükertemi arogo sendoka yutsür talang nung oa mission mapa toktepa inyakba tensa ka ajuruogo. Iba ajanga Tsüngrem osangtajung sangdongba nung kanga takok ngua aruogo, saka tanü putu nung mission mapa ya talang nung masü saka ana nung aser pei arogo nung amangbapurtem asoshi inyaksü ajaki temulung agütsütsüla. Yamaji meinyaktetra Tsüngrem tsungdang asenok sentsütsürtem asütsü.

OTEM:

putu aika lia aruba aser tatalokba otsütem asenoki züngshir. Pututem shia meimchir libaliro, awashi, inyaksangshi aser tejen yimya aika tapet küma melena yanglushir benshia aruba asenoki meteta lir. Temelenshibatem ajaki par putu-tensa den apet yanglushia inyak ta angateter. Aji oda, tanü asen tendak inyakyim ajanga shih aser tanela külemi liromedema indaksütsü merangtsü nungdaker, kechiyong ana ya taküm ka nung pilatsü makokba tongtipang shilem ka lir; koba nung arogo aser lokti tentet ajaki longjemer inyaksüsa wadang tulu ajiteter. Lenmang aisü nung tensa den apet Tsüngremer wadang melenshia odagi, aser ya terenlok akaba temaitsü lir. Iba dak alaka arogo aser tenzükertemi samaba santem bushitsü aser lisü agi sendaka ayuba medem, tapet Tsüngrem O ajanga mesüa tangatetba agütsütsü alimai yimlar. Ya asangsangnung atalokdaksütsü asoshi putu den mangdang akaba lenirtem alimai nungdaker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



ABAM kubok aliba arogo ajak nung April 18, 2021 amongnu anogo ya tanurtem anogomong mongogo. Iba anogomong sentong nung DABA kubok Merali Fellowship nung tanurtemi shilem agiba noksa ka yangi angur.

RCCG Arogo nungi puer aoba züngsem 8 prongla chiokogo

April 18, 2021: Ita ka tejaklen Redeemed Christian Church of God (RCCG) Arogo nungi züngsem ti mejangjaba nisungtemi puer oa liasü saka tawa parnok ajak chiokogo, ta osang ka ajanga metetdaksü.

RCCG General Overseer Pastor, Enoch Adebayo-i twitter ajanga, "Tangari puer aoba asen adianutem chiokogo, ta tanü kü dangi osang aruba ni tepela nung sangdonger. Parnok ajak chiokogo aser temang tendangtsü atema hospital-i anir ogo. Sentsüwangshi ajak Yisu meyong süang. Linük nung tensa majungba tesem ajak nung tesünep alitsü atema Yisu tenüng nung sarasademer," ta metetdaksü.

Nigeria nung mapang shia prangpong amer telok balalai nisung puer aoba sülen nisung melen sen akhanger, aser iba dak sendakba nung Commissioner for Internal Security & Home Affairs' Samuel Aruwan-i sangdong ka ajanga, "Kaduna State sorkar tangatetbaji kasa dang; sorkari ken o mejembitsü mesüra auertem nem parnoki akhangba ama sen magütsütsü," ta metetdakja liasü.

Taoba ita Nigeria kübok Kaduna State nung Arogo sentong ka nung adentsü atema

Arogo nungertem bus ka nung aoba mapang prangpong amer telok kati bus soiter Khristan 8 puer oa liasü.

Redeemed Christian Church of God Arogo nungi züngsemtemji Kafanchan nung Arogo nung Easter sentong "Let's Go a Fishing" nung adentsü atema aoba mapang nung prangpong amer telok kati parnok ajak puer ao. Arogo indang bus ji iba tesem nungji toktsü. Bus nungji "The Redeemed Christian Church of God, Region 30, Trinity Sanctuary, Kaduna" ta zülua lir.

Osangbener den jembidang Redeemed Christian Church nung Pastor aser media & public relations tongti, Olaitan Olubiyi-i, par züngsemtem kümzüksü atema Arogoi security agencies den tongtepratepa inyakdar, ta metetdakja liasü.

Pastor-isa, "Iba tatalokba atema onok kanga mepelar, aser Arogo ka ama asenoki inyaktsü tajungtibaji Tsüngrem dang sarasademtsüba dang. Arogo ka ama onoki sarasademdar aser Tsüngrem dang Pai melungba inyakang ta ashir," ta metetdaksü.

Iba tatalokba sülen Amongnü (March 28) leadership retreat agiba mapang nung Christian

Association of Nigeria's Youth Wing National Chairman, Belusochukwu Enwer-i sorkar dang meimchirtem anema inyakba mapatem nokdangang, ta takhangba agüja liasü.

Nigeria nung iba ama tensa ya sorkari mazüoktetra nüburtemi pei kümzüka alitsü atema peisasa inyaktsüsa akümsü, ta pai metetdakja liasü.

Matt Chandler leniba nung Acts 29-i 'Church Planting Sunday' among

April 18, 2021: Tsüngremi Pa mapa inyaktsü atema Pa asoshi tongti mission ji Arogo tasen tentetsüba lir, aser Yisu Khrista temang ka ama Khristan ajaki lenla balala ajanga Yisu Khrista osangtajung sangdongba nung shilem agitsüla, ta Acts 29 nung Executive Director, Brian Howard-i ashi.

Osangbener den jembidang pai, "Yisu Khrista indang mission ataloktsü atema Arogo tasen tentetsütsüji kanga tongtibang. Arogo peria tenteta lir, ta asübaji tiyazü. Anüolen alirtemi alima tesem balala nung mission field reprangtetba ama North America ya-a mission field ka ama züngshitsüla," ta ashi.

"Arogo tasen tentetsütsü mapaji pastor tem mapa kija masü saka asenok ajaki shilem agitsüla. Arogo tasen tentetba ajanga Arogo tejenpurtema

ANOGO ABEN TSÜNGREM DEN

Shisatsü tajungba

"Shisatsüji tongpang nung nok-o-nü dang nungi tajungba, saka temenenpur kati tajung aika samatsür." Sayutsüngir 9:18

Alima ajak nung nüburtemi pei linük (Nation) lima aser nübur kümzüka aser wazüka ayutsü atema budget nung sen aika inoka nok-o-nü tajung aser tesashi jenti yanglur aser pi dang nungia alizüka yuteper. Tanü alima nung nok-o-nü yangluba nung sen timtiba indokba linükji USA, parnoki par sen dollar 718 billion tashi 2020 küm amshitsü renema aliba angur. Saka Tsüngrem O-ji kodang shisadangdir, nok-o-nü dang nungi shisatsü temaba aser tajungba; kechiaser kodang ana indangji asadangdir nok-o-nü jagi kodanga yimjung bener marutsür saka tesamatsüba mesüra teraksa tuluba agütsür; saka tongpang rara alidak, kodang yimjung O bentepa jembidir, iba jagi raraba anendaktsür aser alima aser nüburtem tesünep jenjang dangi anir arur. Temeim amangbapurtem, Tsüngrem nungi anguba teindang shisatsü aser asen lima aser Arogo nung aliba nungdakba nüburtem yaritettsüsa asenok moaja amlepong ta sarasademi.

Sarasadem

Temeim Tsüngrem nai agütsüba shisatsü timi ketdangsüa amshiba ajanga tangar yaritettsü Nai ni maneni yariang ta sarasadema mepishir. Amen



Church Planting networks-i Thailand nung training agütsüba mapang tangokba noksa nung angur.

asentenshitsüba dang masü agiogo. saka telok tasen nung rangloker inyaker aser aika ajangzüker. Asenok ajaki senotsü agi süaka nübo agi süaka Arogo tasen tentetsüba nung shilem agitsüla," ta pai ashi.

Acts 29-i April 18, 2021 nü tang mezüng Church Planting Sunday mongogo aser Arogo balala danga iba Sunday amongtsü ayongzüka liasü.

"Church Planting Sunday anogomong nung Acts 29 aser tanga networks-i Tsüngrem tashi ajanga inyaktetba mapatem atema benjungteper. Linük tesem ajungalen tatalokbatem atema onok pelar," ta Howard-isa metetdaksü.

2014 küm Village Church Pastor, Matt Chandler-i Acts 29 nung Tir mapa agizüka liasü aser 2020 küm May ita nung Howard Executive director shima liasü.

Howard-i ashiba agi, alima nung coronavirus wara liaka 2020 küm iba network-i Arogo tasen 25 tentetsüba nung shilem

"Tang item Arogotemi züngsemtem nem chiyungtsü agütsür aser Covid wara liaka ajak longjemer timtemertem yarir," ta pai ashi.

Küm 20 tejaklen tentetba Acts 29 kübok alima tesem balala nung Arogo 700 jungnüa lir aser iba nungjagi Arogo 500 shibo United States nung lir.

Taküm Acts 29 Español aser Acts 29 Urban na tenzüka tesem balala nung Arogo tasen tenzüktsür, ta paisa metetdaksü.

"Bendanglen nungi arurtem aser yimti mesüra yimsüngtem kübok tesem tamajung nung Arogo tasen tentetsütsüji kanga tongtibang," ta Howard-i ashi.

"Onoki inyakba ministry kübok onoki zünga balala aliba tesemtem, nisung tasen aliba tesemtem aser linük balala nungi arua aliba tesemtem nung rangloker Arogo tasen tenzüktsür.

(Maneni tapak 9 nung...)



April 8 nungi April 11, 2021 tashi Frontline Ministries-i Tzüdikong Town Baptist Arogo nung Mother Heart Skool agiba sülen tangokba noksa nung angur. Iba sentong nung tetsütem 66 graduate süogo. Iba sentong nung shisalen sayurtemji Dr. Bendangla Changkiri aser Rev. Dr. Toshi Langu nung liasü.

OLONG PAITEP # 5786

	1				2	3			
4			5						6
						7			
	8								
	9			10			11		
						12			13
14									
						15			
		16							

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5785 TELANGZÜBA

TIPILEN :	LANGTSÜNGLEN :
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong, 6. Lungkak,
10. Tsüngpang, 11. Tesangwa,	7. Milak, 9. Zünga, 10. Temopu,
13. Aoksa, 15. Putir, 16. Yipru.	12. Walu, 14. Ali.



DELHI NUNGI MODI-BAI ALOKBA DEN JEMBIR

Modi-ba : Hellow ...Mr.Alokba.... Ni Indian Prime Minister-i Delhi nungi jembir.
Alokba : Ayaaayaya...!!!!!! Ya asangsang asü pongmang...??? Ni ama 'Yimpezük' nisung ka dena Prime Minister-bai jembitsüba ya koda...!!!!??? Hellooo... Tulus...Ni Alokbai langzür ako...Na kechi shirnur odang shiang Sir...!!!
Modi-ba : Ena.... Naga lima nung ner Ao kin-ji kechisarena ajak nung 'Samanir' ta nenok sasa kanga asükümer.... Saka ner Ao kin to "Hero' jenjang nungi 'Zero' jenjangi aluogo nooo ... akhidangbo onok den ajuruteptsü Delhi-i arudang ner Aor Chief Minister ser anir aru.... saka küm aika ner Aor kata CM-ser anir marur ado...iba dangji 'Samanir' ta ajar...!!!!!!?????
Alokba : Ayyyaaaa... Tulus nai ashibaji ojang tasü-to kata tai mali...ajakji shitak-a. Joko ozü Ao kin-ji 'Bongdang tazüng nungi ola tulu adokba' iba-do dang mesuka kümogo nii.
 Lilir : L.Kika Pongener.

TANÜBO NAI LANGZÜANG

Q. Koba küm British Film Academy ya British Academy of Film and Television Arts (BAFTA) agi melen?
 A. 1947 B.1974 C.1967 D.1976

(Taruba adok nung onoki langzüsü)
YASHI ADOK TELANGZÜBA : Kerala

AO OSHI ANGAZÜKDAK:

TANÜ ANGAZÜKTSÜBA OJANG

Benok

(v) Senden nung jembitsü onük agütsüba (placing agenda)

* Leniri senden nung jembitsü tongtibang onük **benok**.

Bensa

(v) ki yanglua akaba raksa (dismantle)

* Ki tasen yanglutsü atema ki tejenba **bensa**.



Tir Yimyim

NAI-A YA METETTER MA?

INDIA NUNG ZOO TULU KAR:

- Arignar Anna Zoological Park (Vandalur Zoo)**
 * Location: Chennai, Tamil Nadu
 * Started in 1855
 * Area: 6.03 km2 or 1,490 sections of land
- Nandankanan Zoological Park**
 * Location: Bhubaneswar, Odisha
 * Started in 1960
 * Area: 4.006 km2 or 1080 sections of land
- Indira Gandhi Zoological Park**
 * Location: Visakhapatnam, Andhra Pradesh
 * Started in 1977
 * Area: 2.52 km2 or 625 sections of land
- Assam State Zoo cum Botanical Garden**
 * Location: Guwahati, Assam
 * Started in 1958
 * Area: 1.74 km2 432.4 sections of land
- Nehru Zoological Park**
 * Location: Hyderabad, Telangana
 * Started in 1963
 * Area: 1.53 km2 or 380 sections of land

(Maneni asüng adok nung...)

SUDOKU # 5829

TELANGZUBA # 5828

8	1	4		7		6	9	5	5	6	7	4	9	8	1	3	2
		2	1	6		3			9	4	8	1	3	2	6	5	7
					5		1		2	3	1	5	7	6	9	8	4
1		5	9	3				4	3	7	4	6	8	9	2	1	5
		8	6	2				3	1	2	6	3	4	5	7	9	8
9		3	4				8	6	8	9	5	2	1	7	3	4	6
3			2	9	5	6			6	8	3	7	5	1	4	2	9
						8			4	5	2	9	6	3	8	7	1
7	8	6			3	2	4	9	7	1	9	8	2	4	5	6	3

OJANG LUTEP # 5373

- ÜONK :
- ULTU :
- SÜRMEA :
- AKBTASO :
- HITASR :
- ÜNGTSDA :
- BITJEEP :
- GANNUNG :
- NGBTAJUA :
- MEAKÜR :

OJANG LUTEP TELANGZÜBA #5372

TEJEMBIRI TAJUNG DANG JEMBI SAKA TAMAJUNG
 BILEMERI TAJUNG KECHA MANGATETTSÜ

TAN HOPTA ATEMA - KOMA SÜLA ?

Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?



April 18, 2021 nü Nandurbar nung aliba Nandurbar railway station nung coronavirus agi shirangertem atema isolation coaches agütsür. Train coaches nung temperature ajemdaktsüsü atema gunny bags aser water drip system amshir.

Delhi hospitals nung ICU yipten ishika dang anünga lir: Kejriwal

New Delhi, April 18 (Agencies): Amongnü Delhi Chief Minister, Arvind Kejriwal-i, tesüiba ghonda 24 tsüingda Delhi nung nisung 25,500 tema dak coronavirus putetogo, ta metetdaksü.

Kejriwal-isa, Delhi sorkari Centre sorkar dang coronavirus agi shirangertem atema yipten aser oxygen supply agüjang ta mepishiogo, ta metetdaksü.

Tang Delhi nung aliba hospital tem nung ICU yipten 100 den tajemba lir, aser iba tensa tamajungba kümдар, ta chief minister-i metetdaksü.

Tang yimti nung Central sorkar hospital nung yipten 10,000 nungi yipten 1,800 dang coronavirus agi shirangertem atema mekazüka lir, ta pai metetdaksü.

Kejriwal-i ashiba agi, Amongnü anepdang pai Union Home Minister, Amit Shah den jembiogo aser yipten tali nüngdakba indang metetdaksüogo.

"Onoki Centre den maneni tongtepratepdar aser parnok dang nungi teyari agidar," ta pai ashi.

"Tang nisung timba-timba dak coronavirus putetba agi yimti nung yipten aser oxygen agi kanga anünger. Centre sorkari Delhi nung aliba hospital tem nung covid agi shirangertem atema yipten 10,000 nungi tajemba agia yipten 7,000 bo mekazüka ayutsüla aser rongdak süa oxygen supply agütsüsü," ta pai ashi.

Amongnü Delhi sorkari yimti

nung covid agi shirangertem yariba nursing homes aser nija hospital ajak dang parnok hospital nung aliba ICU yipten shilem 80 bosa coronavirus agi shirangertem atema mekazüka yujang, ta tuyuogo.

Medical superintendents aser nursing homes-i sangdong ka ajanga, nija hospital 115 nung ICU yipten shilem 100 jungnüa aser ward yipten shilem 90 nungbo shirangertem lir, ta metetdaksü.

"Anungji yipten capacity timba akümtsü atema coronavirus agi shirangertem yariba nursing homes aser nija hospitals ajak nung ICU yipten aser ward nung aliba yipten shilem 80 bosa mekazüka ayutsü atema tuyur," ta kasa tetuyuba nung shia lir.

Manmohan-i PM Modi den Covid atema tebilemba onük 5 lemsatep

New Delhi, April 18 (Agencies): Amongnü taoba mapang Ato kilonser, Manmohan Singh-i shidi ka ajanga Ato kilonser, Narendra Modi den sorkari coronavirus wara anema raratsü atema tebilemba onük pongu lemsatepogo.

Manmohan Singh-i shidi ajanga Modi dang, wara anema raratsü atema Covid vaccination programme tulutiba atemzüka inyaktsüla aser nütsüing shilem kwi nem iba vaccine agütsür, iba nungji rangloker inyaktsüla, ta metetdaksü.

Congress lenir tain, Manmohan-isa, asalentong shidak benoka inyakra asenoki tekaraba nung tajungtiba inyaktetsü akok, ta ashi.

Covid-19 anema raratsü atema Manmohan-i benokba onüktemji yamai:

"Taruba ita trok tsüingda sorkari vaccine agütsüsü atema alizüing atemzüka yur vaccine jelia mangatsüla, ibaji ajanga vaccine yanglurtemi mapang shidak nung supply agütsütetsü," ta Manmohan Singh-i ashi.

"Vaccine supply ji state balala nem koma lema agütsüsüar sorkari ibaji yimjak nung sangdongtsüla. Rongdak

nüngdak atema Centre sorkari shilem 10 mekazüka ayutsüla, iba dakji alaka state tem nem kwi agütsüsüar ibaji tejangja metetdaksüsüla, ibaji ajanga state temi peipei sasep nung jelia sentong yanglur inyaktetsü," ta pai ashi.

"Frontline workers ji shirnokar ibaji latettsü atema Centre-i state sorkartem nem tashi agütsüsüla. Tatitshitsü agi, state karibo school tesayurtem, bus, three-wheeler aser taxi driver tem, municipal aser panchayat staff tem aser court-i aor lawyers-a frontline workers nung züngoknüa alitsüa akok. Yamaji süra parnok arrshi küm 45 tekübok süaka parnok nem vaccine agütsütetsü," ta pai ashi.

"Ozüng kübok compulsory license agütsüsüla, ibaji ajanga company aikati vaccines yanglutetsü. Vaccine amshitsü atema license ngua aliba vaccines ji bendanglen nungi bener arutsü atema melatsüla. Linük nung supplies telatet ka dang, anungji European Medical Agency mesüra USFDA-i temelaba agüja aliba vaccine tembo bendanglen nungi bener arua yangi amshitsü atema melatsüla," ta paisa mepishia metetdaksü.



Mumbai, April 18, 2021: Amongnü Mumbai nung police-i coronavirus anema tenokdangbatem alema inyakba garitem soitba noksa nung angur.

India nung ano nisung 2,61,500 dak Covid putet aser 1,501 asü

New Delhi, Rongchii/April 18 (Agencies): Tesüiba anogo ka tsüingda India nung ano nisung 2,61,500 dak coronavirus putetogo aser iba tashidak agi nisung 1,501 süogo; iba sülen India nung coronavirus caseload ajak agi 1,47,88,109 kümogo aser iba tashidak agi asür ajak agi 1,77,150 jungogo, ta Amongnü Union Health Ministry-i metetdaksü.

Tanü agi anogo 39buba anogo shia linük nung iba tashidak agi teshirangdakpur timba-timba kümдар, aser tang iba tashidak agi teshirangdakpur

18,01,316 lir; iba tashidak agi shiranger anepba shilem ajema 86.62 dang kümogo, ta Health Ministry-i metetdaksü.

Linük nung iba tashidak agi shiranger ajak agi 1,28,09,643 anepogo aser iba tashidak agi shiranger asüba shilembo 1.20 dang kümogo.

Indian Council of Medical Research-i ashiba agi, April 17 tashi nung linük nung coronavirus samples ajak agi 26,65,38,416 tendangogo aser iba nungji Honibarnü samples 15,66,394 tendangba densema lir.

Tesüiba ghonda 24 tsüingda

linük nung iba tashidak agi asür 1,501 nungji Maharashtra nung 419, Delhi nung 167, Chhattisgarh nung 158, Uttar Pradesh nung 120, Gujarat nung 97, Karnataka nung 80, Madhya Pradesh nung 66, Punjab nung 62, Tamil Nadu nung 39, Rajasthan nung 37, Uttarakhand nunga 37, Bihar nung 34, West Bengal nunga 34, Haryana nung 32, Jharkhand nung 30, Kerala nung 17, Telangana aser Andhra Pradesh na nung terpongungu aser Himachal Pradesh nung nisung 12 asüba densema lir.

Mamata-i yimten nung anentsü: Amit Shah

Purbasthali (West Bengal), April 18 (Agencies): Amongnü Union home minister, Amit Shah-i, West Bengal nung tang tashi nung election shilem pongu agia aliba menden 180 nungi BJP-i menden 122 nungbo takok angutsü, ta metetdaksü.

Amongnü Purba Bardhaman district kübok Purbasthali nung election sentong ka nung jembidang Shah-i, state chief minister aser TMC tongti lenir, Mamata Banerjee-i yimtenren nungi anentsüsa akümtsü, kechiyong lai Nandigram menden nung tamakok angutsü, ta ashi.

"Election shilem pongu agiba sülen Didi (Mamata) temelung ajema kümogo, kechiyong BJP-i menden 122 dak tema nung takok angutsü

ta jangjaogo," ta pai ashi. "Suvendu Adhikari (BJP candidate)-i Nandigram menden nung takok angutsü," ta pai ashi.

Ozüng alema arua alir bendangertemi sensotem indang tajangzük ajak agir, ta shia Amit Shah-i, "Didi (Mamata)-i na aser ni ama nisungtembo second-class sensotem ama züngshir, kechiyong la indang vote bank nung asenokbo maden," ta ashi.

Honibarnü (April 17) West Bengal nung election shilem pongububa agiogo aser iba shilem nung candidate 342-i toktepa liasü.

State nung shilem 8 lemsar assembly elections agir; April 29 nü election tembangtsü aser May 2 nü vote zünga election osang sangdongtsü.



Lucknow, April 18, 2021: India nung coronavirus kanga prokba mapang Amongnü Lucknow nung Lucknow Nagar Nigam-i sanitization drive tenzükogo.

Sony-i 'Xperia 1 III' aser 'Xperia 5 III' saya

Mumbai, Rongchii/April 18, 2021 (Agencies): Sony ajanga camera technology aketba flagship phone lineup tasen sangdongogo. Item rongnung Sony Xperia 1 III, Xperia 5 III aser Xperia 10 III (III tetezü - Mach 3 alitsü) dena lir aser smartphone asempronlga taküm tsüklawa mongpu mapang nungi teshimtet shishilembadak ayoktsü.

Sony-i item phone jenjang atema osang magütsü, saka device asempronlga ya budget, mid-range aser premium variant asütsü ama asadangteter. Phone asem rongnung Sony Xperia 1 III ya 2021 küm atema company indang flagship phone alitsü. Ano külen, Xperia 5 III nung top-end feature kar jenjang tajemba agi angutsü. Xperia 10 III ya mid-range smartphone alitsü.

Sony indang smartphone nung camera technology tasen inoka yangluba ajaki jangjaa lir. Sony's Alpha digital camera den meyoktepa item smartphone camera yangluogo. Sony Xperia 1 III aser Sony Xperia 5 III nung autofocus system aser dual phase-detection system inoktsüogo.

Phone anapronlga nung Qualcomm Snapdragon 888 processor ajanga tashi agütsür aser 5G support asütsü.

* Sony Xperia 1 III

Iba flagship smartphone nung 6.5-inch 4K (1644x3840 pixels) HDR OLED

CinemaWide display den 21:9 aspect ratio aser 120Hz refresh rate angutsü. Tekümzüksü atema phone tema nung Corning Gorilla Glass Victus protection inokja lir aser DCI-P3 colour gamut shilem 100, 240Hz motion blur reduction, aser 240Hz touch sampling rate inokja lir. Phone tesülen, Gorilla Glass 6 agi meyibangtsüogo.

Xperia 1 III ya octa-core Qualcomm Snapdragon 888 SoC ajanga tashi agütsür, koba 12GB RAM aser storage options 256GB den 512GB agütsütsü; aser microSD card ka ajanga 1TB tashi atsülanga amshitettsü. Device ya Android 11 operating system ajanga achaayangtsür aser dual SIM support asür.

Camera atema, Sony Xperia 1 III tesülen Zeiss optics indang triple camera setup inoka yanglutsüogo. Iba setup nung primary lens ji 12-megapixel (f/1.7) primary Exmor RS - mobile sensor, sensor ana den 12-megapixel (f/2.3 aser f/2.8) secondary Exmor RS - mobile den variable telephoto lens aser 12-megapixel (f/2.2) wide-angle lens den 124-degree field of view angutsü.

* Sony Xperia 5 III

Xperia 5 III nung 6.1-inch full-HD+ (1080x2520 pixels) HDR OLED CinemaWide display den 21:9 aspect ratio aser 120Hz refresh rate inoka yanglutsü. Phone tejaklen Corning Gorilla Glass 6 agi

meiyibangja lir. Snapdragon 888 SoC den 8GB RAM aser 256GB internal storage ajanga phone maparen achaayangtsür aser 1TB tashi atsülanga amshitettsü. Iba phone nung Android 11 dena lir aser dual Nano-SIM support asür.

Xperia 1 III ama Sony Xperia 5 III nunga triple rear camera setup den sensor aser lens kasa angutsü. Iba den külemi tejaklen selfie camera lens kasa alitsü.

* Sony Xperia 10 III

Sony indang phone tasembuba - Xperia 10 III nung 6-inch full-HD+ (1080x2520 pixels) HDR OLED display den 21:9 aspect ratio aser Corning Gorilla Glass 6 angutsü.

Octa-core Qualcomm Snapdragon 690 SoC den 6GBbRAM aser 128GB onboard storage ajanga phone maparen achaayangtsür aser microSD ka ajanga 1TB tashi atsülanga amshitettsü. Iba dual-SIM device ya Android 11 ajanga nungittsü aser security atema fingerprint sensor keta lir.

Camera tsütsü reprangdangra, Xperia 10 III nung triple rear camera setup den 12-megapixel (f/2.8) primary Exmor R - mobile sensor, 8-megapixel (f/2.4) macro lens aser 8-megapixel (f/2.2) ultra-wide-angle lens angutsü. Selfie atema iba smartphone tejaklen 8-megapixel (f/2.0) camera sensor inoktsüogo.

Project ka nung Kiara aser Ranveer na longjemtsü



New Delhi, Rongchii/April 18, 2021 (Agencies): S Shankar indang Tamil psychological thriller Anniyan (2005) film tanaben yanglutsü aliba project ka nung actress Kiara Advani-i Ranveer Singh den külemi shilem agitsü terenemba lir.

Mid-Day' sangdong ajanga angazükba agi, iba project nung

adentsü asoshi Advani-i Hokolbarnü tezüngzüktep agiogo. Vikram-i tongti shilem agiba film indang rights' ya producer V Ravichandran meyong lir ta sangdongba sülen mangatetep adok aser Shankar-ia film rights' ya pai agizük ta nokdak.

Ranveer Singh-i, Shankar tasa nung anidaka shilem

agitsü maongka anguba ya temoatsü ka ama bilemer, ta ashi.

"'Anniyan' ama ostü tajung aketba film ka nung tongti shilem agitsü lemsatetsüba ya artist mashi ka atema tebilemba tulu ataloker ama alitsü. India nung sempet tajung alir film yanglur rongnung Vikram sir ka alitsü aser artiste tajung ka ama pa kanga sapur. Mezüng film nung pai tasa tajung amshiba ajaki nguogo, pa den shingai medemdangtsü makok. Iba project nung kü shilem ajanga audience tem den tesendaktep tali dang akangshitsü imla atar. Taküm nung iba amala maongka aiben majurur aser kü dak aketba sempet tajungtiba amshia nungittsü tebilemba lir," ta Ranveer-i lemsatetep.

Matt Chandler leniba nung...

(Tapak 5 nungi...)

Nütsüng balala aliba tesem nung nüburtem ayimjema Khrista osangtajung sangdongtsü atema Arogo tasen tenzüksütsüji kanga nungdak," ta paisa metetdaksü.

Taküm küm tetenzüklen Acts 29-i Grimké Seminary den partnership yanglua liasü. Iba seminary yagi Arogo ministry nung inyaktü atema pastor tem nem training agütsür.

Grimké nungja ya alar kibong ka nungi sotetba Dr. Francis

Grimké nungtem nung jaloktsüba seminary lir. Dr. Francis Grimké alar kibong ka nungi sotetaka tesülen pai alar tia nungi nüchiba angu, iba sülen pa pastor ka küma meimchir temeden atema inyaker tongti ka aküm.

Coronavirus wara süiadokba sülen tensa balaka asütsü, ajisiüaka alima tesem ajungalen kanga rongdak süa Arogo tasen tenzüksütsüla, ta Howard-i ashi.

"Arogo tasen tenzüksüba maparen maneni inyaktü, ajisiüaka khenkenbo Arogo tasen ka tenzüksütsü atema küm ka-ana tashi agir. Tang coronavirus wara aliba agi iba maparen nung timtem tera ajurudar, ajisiüaka onoki maneni tejakleni oa inyaktü. Coronavirus wara liaka Arogo temi tetsükdaksü aika koktetogo aser Arogoi züngsemtem tajungtiba nung tenzükgogo," ta paisa metetdaksü.

MULUNGNEŊ O

ASO:
1921



ASÜ:
11/04/2021

Tsürabur Asür **Tsübayimba Ajem** (Chungtia) arishi küm 100 tashi onok akümdong tajungtiba süa arur, mapang tatsüka shiranga alidang aser akümüli tempangba anogo tashi kija, lokti balala aser temeimertem shirnokisa sarasadem, nübu aser rongsen agi ozü nungita yariogo, nenok ajak dang kanga pelaba lemsateper.

Asen teyanglur, takar aser tulusang Tsüngremi nenok ajak maneni moajang ta onok sarasadem.


Temeim Chirur, Semchirtem aser Anükapang.

ALIAYOKER

Old Showuba area near Four Lane

1. Per Sq.ft. Rs. 90 2. Per Sq.ft. Rs.150
9856603713 / 9362576107

Arjun aser Neil dak Covid-19 putet



Arjun Rampal

Neil Nitik Mukesh

Mumbai, Rongchii/April 18, 2021 (Agencies): Actors Arjun Rampal aser Neil Nitik Mukesh naprongla dak COVID-19 positive putet aser tenapronlga pei pei kidang quarantine südar.

Rampal aser Mukesh nati social media sabang ajanga iba osang lemsatepa liasü. Hokolbarnü, arishi küm 48 tain Rampal-i, kü dak iba tashidak temaitsü agi kangshiba timtem maliyongjia, medical tutuyuba nung anidaka anepaludar. Iba den külemi protocol ajak nung anidakdar, ta lemsatetep

Tesüiba anogo 10 tejakdang kü den ajuruteper ajak dang kümdangshitsü aser tekümdangtsü meratem agitsü asoshi ni mepishir. Tangba tensa ya ajak atema kanga tetsübuttsüka lir, saka asenoki dang shisaka aser kümdanga lira, ibaji asenok tajangzük angutsü. Asenok ajak longjemer Corona akoktsü aser

iba wara anema raratsü," ta Rampal-i lemsatep.

Arishi küm 39 tain Mukesh-i, tekümdangtsü meratem agiyongjia kidang alir ajak dak COVID-19 positive putet. Tang onok ajak kidang dang doctor temi tuyuba mozü agia aser Covid-19 protocol nung anidaka quarantine süa mungdar. Iba ama mapang ka nung onok atema bilemstür ajak dang pelaba metetdaksür aser nenoka kümdanga alitsü asoshi mepishir," ta lemsatep.

Tena den külemi, actress Sameera Reddy-ia la dak coronavirus tashidak putetba den kidang quarantine süa amungtsü osang lemsatepa liasü.

Honibarnü, Mumbai yimti nung nisung 8,811 dak Covid-19 tashidak tasen putet aser iba wara agi nisung 51 süogo. Mumbai nung iba wara adoker külen nungi tashidak puteter nisung 5,71,018 kümogo aser nisung 12,301 süogo.

Putin anemer Navalny...

(Tapak 8 nungi...)

Navalny pusemertemi ashiba agi, pusemer 500,000-i website ka nung tenüng züngoksemba sülen parnoki longkak aittsü atema anogo lemtetsü. Honibarnü tashi nung nisung 450,000 dak temai parnok tenüng züngoksemogo.

Yarmysh-i Honibarnü Russia nungertem dang iba sentong asoshi parnok tenüng züngoksemtsü mepeshi asüngdangogo aser ashiba agi, iba ajanga Navalny taküm

kümzüksü akok.

"Putin-i yimtung nung longkak aitba sentong tululu ayongzüka agiba nem dang telangzüba agütsür," ta lai ashi.

Iba hopta tetenzüklen Navalny kinungtsü Yulia-i pa semdangogo. Lai ashiba agi, la kinungbo lumia longkak ait tenzüka mapang den medemdangra pa tema tozük seret 9 tajemba küma tangbo kilograms (168 pounds) 76 dang kümer lir.



Asia nunger dak mapa tamajung inyakba anema Millbrae, California, United States nung April 17, 2021 nü rally ka agidang nüburtemi shilem agiba noksa nung angur. Asia nunger anema mapa tamajung inyakba aija Millbrae nung ayongzükba rally nung California Lieutenant Governor Eleni Kounalakis dena liasü.

2021 küm Pakistan nung COVID-19 cases timtiba Deobarnü putet

Islamabad, Rongchii/April 18 (Agencies): Pakistan nung 2021 küm tenzüker Deobarnü nisung 6,000 dak tema iba tashidak agi menepa aliba jangjateta küm tenzüker ibaji cases timtiba kümogo aser kasa mapang nisung 149 asü. Iba linük nung tang tashi mozü agütsüba maparen tekeraba nung inyaksü merangba nung timtem maneni mapang lir. Taoba küm June 20 nü nisung 6,825 dak iba virus putetba aser nisung 153 asüba ya anogo ka nung putetba rongnung timtiba liasü.

Deobarnü nisung tasen 6,127 dak iba tashidak jangjateta tang linük nung iba virus agi meneper ajak senteper nisung 756,285 jungogo. Kasa anogo nisung 149 asüba ajanga tang iba linük nung coronavirus agi asür

nisung 16,243 lir. Cases tali akumba mapang sorkari April 21 nungi tenzüka arishi küm 50-59 tsüngta aliba nüburtem nem mozü agütsü tenzüksü, ta sangdongogo.

Taoba mapang mozü ya arishi küm 60 nungi tema nem dang agüja liasü. Tang tashinung nisung million 1.3 dak tema nem mozü ya agüja lir, saka ibai Pakistan nütsüng yongsük million 220 dak tema aliba nungi shilem tilaka dang lir.

Iba linük nung mozü agütsüba maparen ta February 2 nü tenzüka liasü, saka mozü peria mongutetba ajanga inyakyim nung tetsükdaktsü ajurur. Covid Vaccine Global Access (COVAX), koba ajanga mozü timi angutsü asoshi nükjiding yur inyaker, iba tentet

yagi March ita tatem tashinung AstraZeneca mozü doses million 17 shi agütsütsü liasü.

Saka COVAX ajanga mozü ya June 30 tashinung ang agütsütettsü, ta sorkar dang ashi.

Tang Pakistan nung taruba ita COVAX nungi mozü ya doses million 15 angutsü imlar.

"Foreign Minister @HeikoMaas den senden amenba sülen COVAX kübok Pakistan-i #COVID mozü doses million 15 angutsü, ta ni pelashishia sangdonger, koba May ita tashinung agütsütsü," ta Foreign Minister Shah Mahmood Qureshi-i tweet ka ajanga ashi.

Tang COVID-19 mozü asoshi iba linük ya China dak metaloka lir. Russia nungia jurila company kari Sputnik V mozü kar bener arua lir.

Küm aika rarar Syria nung May ita election agitsü

Damascus, Rongchii/April 18 (Agencies): Syria nung taruba ita tir election agitsü, ta linük indang parliament ajanga ashir, aser iba mera ya ajanga Tir Bashar al-Assad tashi tali itshitsü amai ajiteter.

Tanen makai rongrong adokaka aser rongsenketsüng jenjang tamajungba kumaka Assad den tokteper kangabo malitsü amai bilemer.

Syria nung küm ter raraba sülen nütsüng sashia aliba tesem tulutem sorkar kübok lir. Iba mapang nisung 400,000 shi takum samaogo aser Syria nütsüng yongsük tesadang ka dak tali tesem balala nung prokshia lir.

Küm tenet kümsük inyaksü asoshi tir ka atema election ya May 26 nü agitsü, ta Speaker Hamouda Sabbagh-i ashi. Iba election nung tokteptsü jangrartemi Hombarnü nungi tenzüka tenüng zülüoktettsü aser bendang lima nung aliba Syria nungertemi embassy tem nung May 20 nü vote agütsütsü.

Civil war mapang tir election agiba iba ya tanabuba alitsü. Taoba election ya 2014 küm agi,

kong Assad-i vote shilem 92 ngua liasü, koba Syria nung pa den tokteper aser US aser EU ajanga democracy yimya nung masü aser tim mesüi agi, ta aija liasü.

Assad'er kibong nungi züngsem dak alaka Syria nung tir asoshi dangari toktepba 2014 küm mezüngbuba liasü. Saka nüburtemi candidate danga ana ya junga memetet.

Yimjung nung democracy busema longkak aiterem sepaitemi azüdokshia azüokba sülen Syria nung civil war ya tenzü, kong opposition busemertemi nok-o-nü amer nokdak. Rara ya tanem tanemi linük tesem ajungalen prokshia ao, aser meilongi sorkar anemer aser jihadist telok noklang aikati shilem agi aser danga linük temia sorkar busema aser anema rara.

Syria busema teloki linük shilem tulubalen tanaben agiogo aser sorkar anemer kübok aliba province tatembangba, Idlib nung sorkar aser telungpur telok balala tsüngta ceasefire yanglua lir.

Ajidang masü iba linük nung rongsenketsüng jenjang kanga

mejungu kumogo aser chiyongtsü jenjang kanga saka meshir, Syrian sen jenjang maket kumogo, koba anüolen linüktemi tenokdangba agütsüba ajanga lir, ta sorkari tenüng asener.

Putin anemer Navalny mashi mapang ka nung asütsü: Doctor

Moscow, Rongchii/April 18 (Agencies): Tepuokdak yua aliba Kremlin anemer Alexei Navalny mashi mapang ka nung temulungjang agi mapa minyaki akümtsü, kechiyong pa health tamajungba kuma odar, ta doctor temi Honibarnü ashi. Parnoki pa temang anepalutsü atema temelega meshiogo.

March 31 nü tir Vladimir Putin anemsangi pa teberem anguba aser tetsüng bezübelema akumba atema medical treatment shidak agütsütsü khanga lumia longkak ait tenzü.

Honibarnü US tir Joe Biden-ia, pa anepaluba dak sendakba nung alima ajungai ola adokba pusema iba inyakyim ya tim masü ta shiogo.

Arishi küm 44 tain Navalny ya February ita tepuokdaki yok aser pa küm anaser tesadang tepuokdak ayutsü obendang agütsüogo.

Navalny indang doctor Anastasia Vasilyeva aser cardiologist Yaroslav Ashikhmin densema tanga doctor aseme tepuokdak ketdangsurtem dang pa temang anpalutsü atema parnok nem tangsa tang temelaba agütsütsü mepeshia asüngdangogo.

"Onok indang patient ya mashi mapang ka nung asütsü akok," ta Ashikhmin-i Honibarnü Facebook nung ashiba den Navalny indang potassium jenjang kanga aika kümogo aser pa intensive care-i belener aotsü nüngdaker, ta ashi.

"Fatal arrhythmia mashi mapang ka nung adoktsü akok," ta pai ashi.

Navalny August ita mim (poison) agi tera agi dang masü, koba pai Kremlin dak tai tongloksüogo. Pa indang doctor-i ashiba agi, pa lumia longkak aitba ajanga temang tamajungba aküm asütsü akok.

Azü nung potassium jenjang litre shia 6.0 mmol (millimole) dak tema lira idangjisa temang anepalutsü nüngdaker. Navalny indang potassium jenjang 7.1 liasü, ta doctor temi ashi.

Doctor temisa, azü tendangba aser pa tawa mim agi kangshiba temulungdang yur pa temang takaratiba nung asadangtsüla, ta ashi.

Navalny otongdar Kira Yarmysh, shiba August ita pa mim agi temang sünger tayimtsü ka nung süjia aoba mapang pa den laisü, lai ashiba agi pa temang kanga mejungi lir.

"Alexie tasür dang. Pa temang jenjang asadanga anogo züngteta dang lir," ta lair Facebook nung ashi.

Laisa, la maneni tayimtsü nung lir ama bilemer, ajisüaka tangbo meyilongi anener ama bilemer, ta ashi. Navalny den ajuruteptsü memelar aser tepuokdak pa dak kechi ataloker aji Russia nunger ishikati dang jangjaa lir, ta laisa shisem.

Honibarnü Navalny timtim indang asüngdangba mapang tir Biden-i, "pa dak kechi atalokdar aji kanga tim masü," ta ashi.

Jude Law, Vanessa Redgrave aser Benedict Cumberbatch nunger densema alima nung tesem balala nungi nüngtugu kaket zülur, artist aser academics 70 dak temai Putin dang Navalny temang junga anepalutsütsü khangogo.

Parnok temepishiba ya Hokolbarnü France's Le Monde osang kaket nung adoktsüogo.

Navalny'er teloki, taoba mapang longkak aitba sentong tulu ka ayongzükba agitsü sentong yanglu, koba parnoki ashiba agi, Russia nung küm tem tsüngda longkak aitba sentong tulutiba asütsü.

(Maneni tapak 9 nung...)



Belarus yimtiba, Minsk nung April 17, 2021 nü 'voluntary work of Saturday' sentong ka alidang nüburtemi war memorial ka nung naro yutsüba noksa nung angur. Iba anogo bendenba sen ajunga ya linük nung aliba medical institution temi amshia medical dak sendakha hadir aser mozü alitsü aser otsü aketba tejen oset aser war memorial tem yanglushitsü. Belarus nung küm shia April 20 meta iba anogo ya yimsü ka ama mongyonga arur.



Kielce, Poland nung AIBA Youth Men's and Women's World Championship nung Gitika-i 48 kg category nung takok anguba sülen tangokba noksa nung angur.

Tzüwar Srihari Nataraj-i National Record yanglu

Rongchii/April 18, 2021 (Agencies): India nung nungtugu tzüwar Srihari Nataraj-i Uzbekistan Open Championship nung gold medal tanabuba anguba mapang 50m backstroke nung national record ka yangluogo. Arishi küm 20 tain asayari Honibar aonung FINA-accredited Olympic qualifying asayamung nung 25.11 seconds nung alizüing tongteta gold medal angur.

Iba asayamung nung India nung asayartemi medal 29 ngutetogo, kong gold 18, silver tenet aser bronze pezü densema lir. Anogo ana tsüingda Srihari-i national record asem tashi yangluogo. Pai 100m backstroke nung national record anaban tashi yanglua liasü.

100m backstroke, kong Srihari-i Tokyo Olympics atema

'B' standard time ajangeta lir, pai iba asaya heats nung 54.10s nung alizüing atong aser iba sülen final nung 54.07s nung alizüing tongteta gold medal angur. Pai 0.22 seconds agi Olympic 'A' qualification mark metongtet.

Kasa mapang nung Olympics nung asayatsü imlaa aliba asayar Sajan Prakash-ia pai asayaba asaya pezüprongla nung kanga junga asayaogo.

Asayamung tatembangbuba anogo Honibarnü Sajan-i 100m butterfly nung alizüing 53.69s nung tongteta gold medal angur. Maneni Maana Patel aser Suvana Baskar nati tetsür 50m backstroke asaya nung gold aser silver angur. Srihari ama Sajan-ia Tokyo Games atema Olympic 'A' mark tera agi metongtet. 2016 Rio Olympics

nung teburtem rongnung Sajan kija India tenüing nung asaya liasü.

Mongolbarnü 200m butterfly asaya nung asayaba mapang Sajan-i, 1.57.85s nung alizüing tongtet saka Olympics 'A' mark metongtet, koba 1:56.48s nung latetja lir. 'B' mark ajangetetba tetezü atakzüka aliba quota masüingtsüsa kümra item tzüwartem Tokyo Olympics nung shilem agitsü atema jaoktsü.

Sajan aser Srihari na dak alia India nung tzüwar Virdhawal Khade, Kushagra Rawat, Aryan Makhija aser Advait Page nungeria pei tata asaya nung Tokyo Olympics atema B standard ajangetetogo. Tokyo Olympics atema tang tashi nung India nung kati danga 'A' standard ajangeteteta mali.

Julian Nagelsmann Bayern Munich Coach akümstsü akok

Rongchii/April 18, 2021 (Agencies): Hansi Flick-i Bayern Munich toktsütsü sangdongba sülen pa melena Julian Nagelsmann shimtsü akok ta German media osang balala ajanga sangdongogo.

Taoba season Champions League tasembuba atonga takok dangi aniaka Flick-i, Bayern toktsütsü sangdongba ajanga German football bangkadaktsüogo. Pa 2023 küm tashi Bayern nung inyaktsü atema tenangzüktepba yanglur lir, ajisüaka pai iba telemtetba agiogo.

Flick-i club toktsütsü telemtetba agiba kuli magütsü, saka Bayern sports director Hasan Salihamidzic den asayar anisemba aser squad achaayangba dak sendakba nung mangatetep aliba ajanga pai club toktsür asütsü ta bilemer.

"Iba osang officially sangdongba ya pa asoshi anisüngzük asütsü. Flick aser Salihamidzic na tsüingda mangatetep aliba bentettsü tanga lenmang kecha mali," ta taoba Bayern captain Lothar Matthaeus aser TV pundit-i, Sky dang Deobarnü ashi.

Matthaeus-isa, Leipzig coach Nagelsmann-i taruba season Flick melentsü ta temulung lema bilemer ajisüaka arishi küm 33 tain coach yagi taoba Bodhbarnü, pa aser Bayern na tsüingda tang tashi nung kecha sensaksema mali, ta shiogo.

German daily Bild-ia, Flick meletsüpur rongnung Nagelsmann temaba jenjang nung toktsüogo, shiba Leipzig den tenangzüktepba yanglur aliba 2023 küm tembangtsü.

Defender Dayot Upamecano dak sendakba nung sensaksema mapang Bayern aser Leipzig tekolakba snati pa indanga benoka sensak semogo. Upamecano ya taruba season Munich nung adentsü.

Kasa mapang nung ex-Bayern captain Mark van Bommel aser Ajax coach Erik ten Hag nata coach atema shimtsü asoshi imlartem rongnung densema lir.

Italian media-ia, Juventus coach Massimiliano Allegri-i Flick melentsü akok ta shiogo.

Honibarnü goal 3-2 agi Wolfsburg akokba sülen Flick-i iba osang metetdaksü. Iba asaya akokba sülen Bayern pur

Bundesliga title tekububa atonga akoktsü atema jenjang kanga junga kümogo.

Asaya pongu anunga lia Bayern pur point tenet agi timba lir.

Bayern puri taküm Bundesliga kokra Flick-i ita 18 club achaayangba mapang asayamung tenetbuba akoker asütsü.

Flick-i, November 2019 küm head coach akümstsü atema maongka agütsüba atema Bayern dang kanga pelaba metetdaksü aser tenüingsang agütsüba mapang Salihamidzic dak alia club nung ketdangser ajak tenüing tetsüha jemi.

Ajisüaka Bayern nung tongti ketdangser; tir Hainer aser chairman Karl-Heinz Rummenigge nati Flick yoktsü meyoktsü iba indang osang agütsü mali.

Flick-isa, pa tarutsü mejangja ta shiogo saka pa German FA-i meyipa arutsü imlar.

Euro 2020 finals sülen Loew-i Germany coach mapa toktsütsü, aser Flick-i pa melentsü akok. 2014 World Cup akokba mapang Flick ya Loew indang assistant coach liasü.

Asian Weightlifting Championship nung Jhilli-i goal angur

Tashkent, Rongchii/April 18 (Agencies): Deobarnü Asian Weightlifting Championship, 45kg category asaya nung India tsür Jhilli Dalabehera-i goal medal nguogo.

Jhilli ya junior world championship bronze medalist lir aser lai snatch nung 69kg ajungket aser clean jerk nung 88kg ajungketa ajak senteper 157kg ajungkettet aser gold medal angur. Iba asayamung ya Olympic qualifier event ka lir, koba taoba küm asayatsü liasü saka wara poktetba ajanga masayateti lir taküm asayar.

Ajisüaka 45kg ya Olympic weight category ka masü.

Iba asaya nung Philippines' nungi Mary Flor Diaz-i 135kg (60kg+75kg) ajungketteta silver medal angur.

Taoba kuma Jhilli-i kasa asaya nung silver medal ngua liasü. Ajisüaka taküm asaya ya lai asayaa aruba rongnung tajingtiba masü, kechiyong lai 2019 küm kasa asaya nung 162kg (71kg+91kg) ajungketteta liasü.

Kasa mapang nung nungtugu weightlifter Mirabai Chanu-i Honibarnü clean and jerk category nung world record tasen ka yanglua bronze medal nguogo.

Olympic nung asayatsü jenjang nguteter alila Chanu-i Honibarnü snatch nung 86kg ajungket aser clean and jerk nung 119kg ajungketa world record tasen ka yanglu. Lai ajak senteper 205kg ajungket, koba la asoshi tang tashi nung tajungtiba asütsü.

Morecambe CC nungi asayatsü atema Jonathan apusoa ogo



Rongchii/April 18, 2021 (Agencies): Nagaland Cricket Team captain, Jonathan Rongsen Longkumer, 2021 season atema Lancashire nung Morecambe Cricket Club nungi asayatsü atema Deobarnü UK-i apusoa ogo.

March ita 29 nü UK nung amendaker aliba cricket club Morecambe CC nungi 2021 season asayatsü atema Jonathan-i tenangzüktepba ka yanglua liasü.

Morecambe Cricket Club ya 1889 küm amenok aser English cricket club rongnung tejentiba ka lir, koba Morecambe,

Lancashire nung amendaker lir.

Arishi küm 34 tain asayar Jonathan Rongsen ya Mokochung district kübok Akhoya yimtsüing nungi lir aser pa ya all-round; right-hand batsman aser medium pacer lir.

Kasa mapang nung Jonathan apusoa mao tsüingda Nagaland chief minister Neiphiu Rio-i Twitter ajanga pai takok tajung angutsü imlaja ataba lemsatetepogo.

Jonathan Rongsen Longkumer ya 1986 küm October ita 4 nü aso aser pa mezüingbuba 2013 küm December 6 nü 2013-14 Ranji Trophy nung Railways nungi asayaa first-class asaya nung shilem agi tenzüik.

2018-19 Ranji Trophy metenzük tsüingda pa Railways nungi Nagaland cricket team nung arua den.

2019-20 Vijay Hazare Trophy nung Nagaland aser Manipur na asayaba mapang pai century ka yanglua liasü.



April 18, 2021: La Cartuja stadium, Seville nung Copa del Rey final nung Athletic Bilbao akokba sülen Spain Chuba Felipe ket nungi Barcelona nungi asayar Lionel Messi-i takok marok agizükba noksa nung angur. Honibarnü iba asaya Barcelona-i goal 4-0 agi koka liasü.

BILEMDANGANG

"Takok tamakok ajak pei dak keta lir."